

Tortolì, prorogau finas a su 30 cabudanni su servìtziu de guardiania in mari



S'amministratzioni comunali de Tortolì at decìdiu de allonghiai finas a su 30 cabudanni su servìtziu de guardiania in is marinas e arenilis de sa bidda, prevìdiu in princìpiu solu finas a su 23 austu.

S'integratzioni finantziària de 36 milla èurus at a permìtiri de garantiri sa presèntzia costanti de bagninus, de is 9 a is 18, in is 17 chilòmetrus de costa. S'ant a controllai de prus is arenilis chi ocannu ant otentu sa Bandera Blu: Sa Capannina (cun dùs bagninus), Santu Millanu, S'Orològiu, Foxi 'e Lioni e Cea.

Sa pròroga est stètia decìdia po mori ca in austu medas stràngius e de su logu, costumant a andai de prus a mari. S'investimentu totali de su Comunu de Tortolì po custa stagioni est de 102 milla èurus.